

Viers un

A Udin un symposium par insegnants di lenghis

Il patrimoni linguistic de nestre region al sarà di gnûf protagonist di un apontament internazionâl dulà si cjataran denant diversis realtâts europeanis. Teme dal incuintri al sarà chest colp l'insegnament des lenghis e si davuelzarà ai prins di Setembar. O vin contade la profe Silvana Schiavi Fachin, presidente dal Centri internazionâl sul plurilinguism de Universitât dal Friûl e esperte di didattiche des lenghis.

Ce isal l'Eunom?

«Il projet trienal (2009 – 2012) EUNoM (Rêt europeane di universitâts sul multilinguism) al à come obietif di meti in lûs lis relacions complessis tra il fenomen sociâl de diversitât linguistiche, la economie de cognossince e de comunicazion e une educazion plurilengâl che a rispindi in maniere efetive a lis dibisugnis di competence in plui lenghis dai citadins di ogni etât tal mont globalizât.

Cui sono i ents che a lavorin su cheste iniziative?

«Il projet al met adun un piçul grup di universitâts e centris di ricercje – la Universitat Oberta de Catalunya; la Queen's University di Belfast; la Fryske Akademy in Frisie; la Primorska University / Università del Litorale, Koper/Cjaudistrie; la Erasmushogenschool , Brussels; il

Centre for European Research, Bangor, Wales e il Centri Internazionâl sul Plurilinguism de Universitât dal Friûl e un grup plui larc di colaboradôrs che al cjape dentri altris 31 istituzions di 15 stâts de Europe plui la Turchie: ES-IT-BE-DE-SI-UK-NE-HU-BG-IE-RO-SK-EE-SV-FI-TK».

Cualis azions sono programadis?

«Si propon di organizâ dôs cunvignis par an sui argomenti plui cjalts e sui ponts plui criticis come la ricercje e la formazion universitarie; la gjestion des societâts e des istituzions multilengâls e multietnics; il multilinguism te societât de cognossince e il marcjât dal lavôr; TIC (tecnologie informatiche),

e-learning e lenghis e l'ultin che si fasarà a Brussels, li de Comission Europeane, su lis gnovis prospetivis de politiche linguistiche».

Cuâl isal il calendari des cunvignis?

«La prime cunvigne e je in program a Udin te Sale des Cunvignis di Palaç Antonini, martars ai 7 di Setembar (dute la zornade, a partî des 9.30) e Miercus 8, des 9.30 ae 1.30 di dopomisdì. Esperts di innomine a fevelaran sui problemis de preparazion dai insegnants di lenghis nativis (minoritariis), secondis e forestis». Par plui informazions, il program si pues cjatâlu sul sit di EUNoM :



La professoressa Silvana Schiavi Fachin

Il sit dal projet



<http://eunom.uoc.edu>, telefonant al Centri Interdipartimentâl pal Plurilinguism: 0432 556460 o scrivint a barbara.villalta@amm.uniud.it. Si metaran a disposizion lis traduzions dai strucs e, pes relacions in lenghe foreste, e sarà a disposizion la traduzion simultanie.